

## Ɔwɔlɔ́á Paulo Lɔ́wanlín Sísí Galatiafɔ

<sup>1</sup> Mí sumbí ɔyɔpɔ Paulo dé ɔwɔlɔ́ ánfí wanlín. Megyí anyánkpósa ntée ɔhaa lówa mí. Yesu Kristo mɔa aní Sí Bulu ámúú ɔɔkɔsúa mu tsú afúlitɔ ámu lówa mí. <sup>2</sup> Nde mú wanlín sísí ɔpasua ání ɔbu Galatia ɔwɔlɔ́su féeé. Mía Akristofɔ́á buɔbu nfi féeé anidé mli itsiá ha ania,

<sup>3</sup> “Aní Sí Bulu mɔa aní Wíe Yesu Kristo bugyíi mli buale, abuha mli iwilwii.”

<sup>4</sup> Yesu anfi lési iwí há bɔmɔ mu aní lakpan su, méní ɔbéle aní tsú ɔyí laláhe anfitɔ; fɛ alí ámúú aní Sí Bulu léhie yáí ámu. <sup>5</sup> Akánfo Bulu bré féeé. Amen!

### *Asɔn Wankláán Kɔkɔ Má Iní Ɔma*

<sup>6</sup> Mli Galatiafɔ, mli iwí lawá mí ifú ání mlilawúna yinkí Bulu ɔma. Bulu lótsɔn Kristo awitɔlesu tí mli ɔbéé, mli bɔbwe mu ahá. Mli kɔ alíá mlilawúna mli dé asɔn bambá hɔɔ mli aa, múgyí asɔn wankláán ámu.

<sup>7</sup> Táme ina ɔtsan há asɔn wankláán ámu. Aha akɔ dékléá báyintá mli agywɔin, abɔtse Kristo asɔn wankláán ámu. <sup>8</sup> Táme ní aní, ntée Bulu-ɔbɔpu ɔku kúráá lótsu ɔsúsú bá, beda asɔn wankláán bambá ku ɔkan súná mli, ina ɔtsan há mú ámúú anilébláa mli ámu a, Bulu ɔlwí mu. <sup>9</sup> Nakó blí asón ánfí, táme ntráa nde mli bláa mbée, ní ɔku ɔbá beda Bulu asɔn wankláán bámbá ku ɔkan súná mli, ina ɔtsan há mú ámúú anilébláa mli ámu a, Bulu ɔlwí mu.

<sup>10</sup> Megyí beé, ndekléá ahá buɔdwée mí. Ó-o! Bulu mboún ndekléá ɔdwée mí. Ní ntráa ndekléá ahá buɔdwée mí á, teki mmegyí Kristo osúmbi.

*Paulo Sumbí Ɔyɔpɔ Bwe*

11 Mí apíó, ndekléá iwánkɪ mlɪ ání Bulu asun wankláán ámúú nde mú ɔkan da ámu imotsú nyankpɔsa agywuntɔ. 12 Megyí ɔhaa wá notsúa mú, ntéé ɔku lósuná mí. Yesu Kristo onutó léle mú súná mí.

13 Tsúfé mlɪlanú mí tsiátó asún, alá ngyi bréá mbuo Yudafɔ-osum ámu, pú alá nehie dínká Bulu ɔpasua ámuɔɔ, nɔbɔ mbódíá néhi amú fée. 14 Nɔhɔ gyankpa mí abatɔ Yudafɔ-osum ámutɔ, pú alá nɔwa nsi gyi mí anáin amándíé kugyíkɔsɔ.

15 Táme Bulu lówa awítɔle há mí. Ɔlele mí yáí tsú bréá mbu mí yín iwítɔ, ɔletɪ mí ɔbéé, nyó mu agyómá. 16 Ɔlele mu Bi ámu súná mí, ménɪ néda mu iwɪ asun wankláán ɔkan ahá ání bɔmegyí Yudafɔtɔ. Mmɔyɔ ɔhaa wá mbéé, osúna mí asún alɪ bré ámutɔ. 17 Mmɔyɔ Yerusalem mbéé, noyówun Kristo sumbí ayɔpú ámúú bubu inɔ asa neba amɔ é. Mboún nenatí laa yó Arabia ɔsulóɔ, neyinkí ba Damasko wúlutɔ. 18 Yesu léle iwɪ súná mí, mú ofi-saasɪtɔ á, nɔyɔ Yerusalem yówun sumbí ɔyɔpú Kefa ání butetráa tɪ mu Petro, netsiá mu wá nke dúanu (15). 19 Mmetrá wun sumbí ɔyɔpú ɔkuku dun anɪ Wíe Yesu mu gyama Yakobo.

20 Ɔnɔkwali asún ndewanlín sísí mlɪ. Bulu yin ání mmédé afunu wa.

21 Mú ɔma a, nɔyɔ Siria pú Kilikia ɔsulóɔ. 22 Alɪ bré ámutɔ á, Akristofɔ ɔpasua ámúú ibubu Yudea ɔsulóɔ ámu bɔmɔkónyá bí mí. 23 Múá bɔdenu tsú mí iwɪ fée gyí, ahá bɔdeblí beɛ, “Oyin ámúú ɔdɪn anɪsɔ ámu ná ɔde hógyi amúú anidé mú asún blí, ɔde anɪ itin ka ámu kén ɔkan da.” 24 Ina mí sɔ bekanfú Bulu.

## 2

### *Paulo Mɔa Sumbi Ayɔpɔ Atráhe Amv*

<sup>1</sup> Nfi dúana ɔma a, mía Barnaba anlékpa Tito buo ɪwɪ, yínkí yó Yerusalem. <sup>2</sup> Bulu léle súná mí ání nyó inu, só nɔyɔ. Alíá mí agyómá mɔɔbwe kpaali su á, negyankpá lé asóntó súná ɔpasua ahande amv nkɔle itsétó. Nebláa amó asɔn wankláán amóú nna nde mó ɔkan da ahá ání bomegyí Yudafɔto ámv. Botsulá dínká mósó. <sup>3</sup> Ibo mótó ání Griikiyin Tito amóú anlékpa buo ɪwɪ ámv gyí, táme bomehie mu beɛ, ɔtín keté. <sup>4</sup> Ibo mótóá Akristofɔ afunupu akvá beki ansí bowie anɪto bekleá ɔtín keté. Tsúfé bodunká ání báyintá ɪwɪsutsiá amóú Kristo Yesu lahá anɪ ámv; abɔbwe anɪ amlɪ nkɔpábi ha Yudafɔ mbla ámv. <sup>5</sup> Táme animési ɪwɪ há amó kpalobí kúráá, ménɪ ɔnɔkwaliá ibo asɔn wankláán ámvto iméetse ha mlɪ.

<sup>6</sup> ɔpasua ahande amóú bɔbɔ inu ámv bomebláa mɪ asɔansu beɛ, mpótsɪa asón wankláán amóú ndeblí ámvto. (Iníá nde amó tɪ ahande kúráá á, megyí beɛ, amó hande amv ibo mɪ labi, tsúfé Bulu mó tamakɪ ɔhaa ansító.) <sup>7</sup> Táme ahande amv bowun ání Bulu lópu asɔn wankláán ámv há mí ɔbéɛ, ndáa mó ɔkan ahá ání bomegyí Yudafɔto,\* fé alíá ɔlɔpɔhá Petro é ɔbéɛ, ɔdáa mó ɔkan Yudafɔto. <sup>8</sup> Tsúfé Bulu léha Kefa ání bɔtetráa tɪ mu Petro túmɪ, ogyi mu sumbí ɔyɔpɔ Yudafɔto. Mu kén láchá mí túmɪ, ngyi mu sumbí ɔyɔpɔ ahá ání bomegyí Yudafɔto é ní. <sup>9</sup> Inu á, ɪɔwankí Yakobo mɔa Petro pú Yohane amóú bɔhíé bɔgyi ɔpasua ámv ɔtan ámv ání Bulu lápú alɪ agyómá ánfɪ kíé mí. Mó su bɔwa mía Barnaba

\* **2:7** Ahá ání bomegyí Yudafɔto támatɪn keté. Yudafɔto gyí keté atɪnpu.

ibi, pòsúná ání anlabwé kole. Botsulá ání mía Barnaba ayó agyómá ahá ání bomegyí Yudafoto, amó é abuyo agyómá Yudafoto. <sup>10</sup> Múá bodunká tsú aní wá gyí, akáin amótó ahá ání buma tótosu. Mú kén gyí tóá ndekléá nóbwe é ní.

### *Paulo Iyinwa Wá Petro*

<sup>11</sup> Táme bréá Petro léba Antiokia wúluto á, nowa iyin wá mu ahá ansító, tsúfé tóá olóbwe itépi ma ale. <sup>12</sup> Bréá oléba a, mu a ahógyipwá bomegyí Yudafó butowá ibi gyi ató, táme Yudafó aku benya tsú Yakobo wá ba pé, olébití iwí lé ahá ámuto, tsúfé ode ahógyipw amúú beé butín keté ámu ifú nya. <sup>13</sup> Iníá ndeblí á, Yudafó atráhe amó é bubuo Petro apinabwébi ání. Barnaba óó léyinkí yó obuo amó. <sup>14</sup> Nowun ání amó bwehé ámu imekanáa onkwaliá ibo asun wankláán ámuto. Mú su nebláa Petro ahá ámu fée ansító mbéé, “Petro, Yudayin fogyi, táme fumedé Yudafó amándiésó gyí. Omátófo amándiésó fodegyí. Ntogyi só fude ahá amúú bomegyí Yudafó ámu hie fee, bubwée Yudafó amándíé ání fakíná?”

### *Hógyisó Bulu Totsun Hó Yudafó Pó Omá Bámbásófo Nkpa*

<sup>15</sup> Yudafó lókwí mía fonyo. Megyí ahá amúú bomegyí Yudafó, bomeyín Bulu mbla ámuto atsu. <sup>16</sup> Táme aní Yudafó Akristofó ámu mó aniyin ání megyí Mose mbla ámu su gyí su Bulu totsú oha ání mu asún da okpa mu ansító, nkéti Yesu Kristo hógyi. Mú su anilahó mu gyi, méní Bulu obótsun mu hógyi amusu há aní asu ní. Tsúfé ní mbla ámu su gyí su mú á, tekti ohaa méegyí asu Bulu ansító. <sup>17</sup> Anidédunká ání Bulu otsúon aní Kristo hógyisu, otsu aní ání aní asún da okpa mu ansító. Táme ní Yudafó aku bude

anɪ mboún kí lakpan abwepó á, múmú imosuná ání asukpan Kristo dé anɪ suná a? Ekekeke! <sup>18</sup> Ní nakíná Mose mbla ámu, láyó nde mósú gyí a, múmú ilosuná ání ito laláhe nɔyɔ ndebwe á. <sup>19</sup> Tsúfé Mose mbla ámu ilosuná ání nawú. Ueha negyi iwɪ, méni nétsiá nkpa pɔpwe há Bulu. Mía Kristonyɔ beda mántá oyikpalíhesu ɔhétó. <sup>20</sup> Mú su ntsie nkpa séi, táme megyí mí onutó tsíe nkpa ɔsulóv anfisv. Kristo, ogyi Bulu mu Bi ámu tsíe mitɔ. Múlódwe mí, bowu há mí. Mu hógyi sù ntsie nkpa. <sup>21</sup> Mú su mmédé Bulu awítale amv kiná. Tsúfé ní Mose mbla ámu sù ɔha obégyi asv Bulu ansító á, múmú kpaali Kristo lówu!

### 3

#### *Mbla Amvsv Gyi Ntee Kristo Hógyi*

<sup>1</sup> Oo Galatiafɔ aha mimláhe! Ma lálé mli ansí alí? Megyí mli onutó ansító behie lé súná mli alíá beda Yesu Kristo mántá oyikpalíhesu, mó mu? <sup>2</sup> Nfite mli asv kua kole. Mose Mbla ámvsu gyí léha mlúnya Ɖhe Wankíhé amv lóó, ntee asv wankláán ámuú mlúnu, mlidé mósú hógyi amv sv? <sup>3</sup> Aha mimláhe mlúkkv mligyí alí á? Iníá mlúpu Ɖhe Wankíhé amv tsúa mli Kristotɔtsiá así mé, mli onutó túmi mlíaa mlúpmó mú ɔnó ngya? <sup>4</sup> Kpaali sù mlúwun ipian ámu fée asv wankláán ámu sv? Megyí kpaali sv! <sup>5</sup> Ntráa fite mli. Mli Mose mbla ámvsu gyí sù Bulu lapó Ɖhe Wankíhé ámu há mli, ɔde ofúla é bwe mlítɔ? Ekekeke! Alíá mlúnu asv wankláán ámu, hɔ mósú gyí sù ɔlɔphá mli.

<sup>6</sup> Mlɔpki anɪ náin Abraham. Ibv Bulu asv wanlínhé amvto ání, “Abraham lóhɔ Bulu gyi. Mú sv Bulu lótsu mu ání mu asón da ɔkpa.” <sup>7</sup> Mú sv

ilehián ání mlébiá ahá amúú bəhə Bulu gyi amv gyí Abraham abí onutó ní. <sup>8</sup> Bulu asvn wanlínhé amv lébli yáí ání Bulu əbótsvn ahá amúú bomegyí Yudafə amv hógyisv, tsú amú ání amú asún da əkpa. Inı sú Bulu lébláa Abraham asvn wankláán amv dododo əbéə, “Fúsú nótsvn yulá əsvlósv ahá féé.” <sup>9</sup> Abraham lóhə Bulu gyi. Mó sv Bulu lóyulá mv. Mó sv séi ánfı á, Bulu əbópv oyúla amúú ələpvúulá Abraham amv yúlá ahá ání bahə Kristo gyi.

<sup>10</sup> Táme ilwí dın ahá ání amú ansı dın Mose mbla amvsv gyısv. Tsúfé bəwanlın wá Bulu asún amvə bəə, “Bulu lalwí əhagyíəha ání omegyı mbla amúú bəwanlın wá Bulu mbla əwvłótó amv féésú.” <sup>11</sup> Séi á, ilawánkı ání əhaa má ınvá mv mbla amvsv gyı sv Bulu obótsv mv ání mv asún da əkpa. Tsúfé Bulu asvn wanlínhé amv lébli əbéə, “Əhá ání mv hógyı sv Bulu latsú mv ání mv asún da əkpa obénya nkpa.” <sup>12</sup> Mbla amvsv gyı mená hógyısv, táme Bulu asvn wanlínhé amv lébli əbéə, “Əhagyíəha ání otegyı mbla amvsv əbótsvn mósú nyá nkpa.”

<sup>13</sup> Táme anı sú Kristo lémlı əha ilwíhé bréá bəda mv mántá oyikpalíə amvsv. Mó sv ələə anı tsú ilwí amúú mbla amv létı há anı amv asi. Tsúfé Bulu asvn wanlínhé amv lébli əbéə, “Ilwí dın əhagyíəha ání bəda mántá oyısú.” <sup>14</sup> Kristo lówu, ménı Bulu əbópv oyúla amúú ələıə há Abraham amv kén yúlá ahá ání bomegyí Yudafə, ménı abótsvn anı Kristo Yesu hógyısv nyá Əğə Wankíhé amúú ələıə amv.

### *Mbla Amv Pó Bulu Nıhıé*

<sup>15</sup> Mı apıó, mpúv ndə tsiátó asún kv flo asún ánfı ha mlı. Alı amúú əha ədınká ibwı mv asúnsv əbéə, əkv ogyıı mv ató, əhaa má əkpa tse mó, ntée lé ıkv mótó amv a, alı igyı ntam amúú Bulu léka há

Abraham amv é ní. <sup>16</sup> Aní náin Abraham mva mv nanyɔ Bulu léka ntam há. Alí asón ánfí imosuná ání mv aná tsɔtsɔɔtsɔ, mboún mv na ɔkɔle pé. Mv na ámv gyí Kristo a. <sup>17</sup> Asón ání ndeblí gyí, Bulu léka ntam há aní náin Abraham, ɔledinká ibwi mósú púsúná ání obégyi mósú. Mbla ámúú ɔlɔwa há Mose nfi lafana advasa (430) ɔma amv méetalí ká ntam amúú ɔledinká ibwi mósú ámúú, ntée tse mú ekekekeke. <sup>18</sup> Tsúfé ní mbla ámúú gyí sv ɔha ibi béda agyapadié ámúú Bulu léhié yáí ámv a, mómú megyí hié Bulu léhié mó yáí Abraham. Táme ɔnɔkwali amv gyí, kie ɔlɔpókíé mv.

<sup>19</sup> Mómú labi mɔmv mbla ámv bu? Bulu lópv mú é mántá mósú, méní ibósuná ahá tóá lakpan gyí. Táme ɔlɔwa mbla ámv ání ibétsiá alí yófon bréá Abraham mv na ámv ɔbéba. Mvgyí mv ató ogyípú ní. ɔlɔpv mbla ámv há mv abɔpv bɔpv bɔwa Mose ibiɔ. Mólɔbwe Bulu móa Israelfɔ nsiné ɔlapú ní. <sup>20</sup> Nsiné ɔlapú tamalíí há ɔbakóle, táme ɔbakóle Bulu gyí.

### *Labíá Mbla Ámv Ibv*

<sup>21</sup> Bulu mbla ámv ɔkɔsú líí mv nhíhié ámúú ɔlehié yáí ámúú? Ekekekeke! Ní mbla kv ɔbétalíí há aní nkpa ání itamatá á, teki abétalíí gyí asv Bulu ansító, ní anlégyí mósú. <sup>22</sup> Táme Bulu asv wanlínhé amv ɔleblíí ání lakpan lagyi ɔyító ahá féésú plíplíplíplí. Mó sv ató ámúú Bulu léhié yáí ámv igyi Kristo ahógyipv klé.

<sup>23</sup> Táme asa Yesu Kristo hógyi lébá ɔyító á, mbla ámv ɔleklíí aní fé obu adípú. ɔhaa ménya mv iwí, bɔfon bréá Bulu lébele Kristo hógyi ɔwan. <sup>24</sup> Mó sv mbla ámv lóbwé anísv ɔkípú bɔfon bréá Kristo léba, méní Bulu obótsu aní ání aní asún da ɔkpa mv

ansítɔ, tsóon anɪ Kristo hógýisv. <sup>25</sup> Iníá Kristo hógýi laba sv á, imehián ání mbla ámv ɔbétrá bwe anisv ɔkípɔ.

<sup>26</sup> Tsúfɛ mlɪ Kristo Yesu hógýi sv mlɪ fɛ́ɛ mlɪlabwé Bulu abí. <sup>27</sup> Mlɪ ahá ání mlɪa Yesu Kristo mlɪlabwé kule tsɔn asúbɔsv mlɪlatsú mv tsiátó fɛ́ɛ. <sup>28</sup> Mú sv Yudayin ntée Griikiyin trá ɔma mv. ɔkpábi ntée ɔdíhie, ɔtsɪ ntée oyin trá ɔma mv. Tsúfɛ mlɪ fɛ́ɛ mlɪlabwé kule mlɪa Kristo Yesunyɔ ikulebwetɔ. <sup>29</sup> Iníá mlɪlabwé Kristo klé sv á, mlɪlabwé Abraham abí-aná onutó, pú mv ató agyípó. Inɪ sv itó ámúbú Bulu léhie yáí Abraham amv igyi mlɪ klé.

## 4

<sup>1</sup> Mliyɔ asón ánfítɔ ki. Ní ɔha owú, sí mv agyapadie yáí mv abí bréá bɔmɔkódan a, bɔgyi fé nkpábi. Ibv mótóá amúbú amó sí ató fɛ́ɛ, <sup>2</sup> táme ilehián ání béba iwiasɪ há amósú ɔkípɔ alu yófɔn nfi oduá amó sí lósuná ání bɔhɔ́, asa abɔpv ató ámv wa amó ɪbitɔ. <sup>3</sup> Alɪ anɪ é anigyí asa Kristo léba nɪ. Anɪlóbwe nkpábi há ɔhé, ntée túmiá ide ɔyí ánfisv gyí. <sup>4</sup> Táme bréá bré ámv onutó lɔfɔn a, Bulu lówa mv Bi sísí, ɔha tsihé lókwí mv wá mbla ámv asɪ. <sup>5</sup> Bulu lówa mv ání ɔbá bɔhɔ anɪ ahá ámúbú anigyí nkpábi há Mose mbla ámv tsu nkpábitɔ, ménɪ ɔbóbwe anɪ mv abí onutó.

<sup>6</sup> Bulu lódunká ání obósuná ání mlɪlabwé mv abí. Mú sɔ ɔlɔpv mv Bi ámv ɔhé wá anɪ iklɔntɔ ní. ɔhé ámv téhá anɪtokpólí mv anɪaa, “Abba, mí Sí!” ní. <sup>7</sup> Mú sv opió, fɔtráa fɔmegyí ɔkpábi, mbóun Bulu mv bi. Iníá mv bi fɔgyi sv á, mv ató fɛ́ɛ igyi fú klé.

<sup>8</sup> Bréá mlumókónyá bí Bulu á, mlilóbwe nkpábi há ikpiá bomegyí tɔtɔ. <sup>9</sup> Táme séi mlilabí Bulu, ntée nébli mbéε, alabí mli. Ntogyi sɔ mlidékléá mléyinkí yósum túmi ánfɔ ɔma labi kɔkɔkɔ? Ntogyi sɔ mlétrá yinkí yóbwe amó nkpábi fé bré ámɔ? <sup>10</sup> Mlidé amándié kɔ bwe nke kɔtɔ, tsra kɔtɔ, bré kɔtɔ pɔ nfi kɔtɔ. <sup>11</sup> Mli bwehé ánfɔ sɔ ifú bɔ mitɔ. Ide mí bwe fé ipian ámóú ndewúun mli sɔ ámɔ féé íbóbwe kpaali.

<sup>12</sup> Mí apíó, nokókóli mli, nabwé mí iwɔ fé mli. Ntráa mma mbla kɔkɔ asi. Mú sɔ mlɔtsia mí atsiábi. Megyí bεε mbéε, mlilapó lalahε kɔkɔ gyi mi, sɔ ndε inɔ blí. <sup>13</sup> Mlilakáin ání iwɔ ma mí ɔnlɔn asa neba inɔ beda Bulu asɔn wankláán ámɔ ɔkan εke gyankpapɔ? <sup>14</sup> Isóki kpɔnkpɔntɔ mí idɔ ámɔ lóbwe há mli, támε mú óó á, mlímóbu mí tɔkɔ. Mboún mlilóhɔ mi fé Bulu-ɔbɔpɔ, ntée Kristo Yesu onutó kóráá. <sup>15</sup> Ansí lehíε gyi anɔ alɔ bré ámɔtɔ! Ntɔ lébá? Mí onutó nowun ání ní mlétalí á, tekɔ mlilólotí mli ansíbi wá mí alɔ bré ámɔtɔ. Mú ntɔ dé mli séi? <sup>16</sup> Alɔ ámóú ndε mli ɔnɔkwali bláa amɔ sɔ namlí mli olupú?

<sup>17</sup> Ahá ámóú bɔdekléá mligyí Yudaɔ mblasɔ ámɔ bɔma mli iwɔ agywun wankláán kɔkɔ. Tɔá bɔdeklé gyí bémain mli lé mísú, ménɔ mlékle amó asún. <sup>18</sup> Ibo aléá ahá bódunká ání mlidwéε amó, agywun wankláán ɔkpasɔ. Megyí bréá mbɔ mli wá wɔle. <sup>19</sup> Mí abí adwεpú! Iwɔ trá ide mí ɔsɔn há mli, fé ɔtsiá ikwú de mɔ dwiín. Nkétɔ mlilanyá Kristo tsiátɔ mlitɔ asa iwɔ bési mí ɔsɔn. <sup>20</sup> Thíε de mí háan ha mli. Ní mí nkɔle sɔ mó á, tekɔ mbɔ mli wá séi, ménɔ nétse mí tɔtɔ.

*Hagar Mva Sara Nfántóhón*

21 Nfite mli ahá ámúú mlidékléá mlóbuo Mose mbla ámu. Mlímónu asón ání ðéblí asi? 22 Bōwanlín wá Bulu asón ámúú bεε, Abraham lókwí abi yinhé anyo. Ɔkule mu yin gyí ɔkpábi, onyɔasi mu yin gyí ɔdihie. 23 Ɔkpábi amu lókwí mu bi keke, táme ɔdihie ámu mó á, Bulu léhie mu yáí ání méha mu obí asa ɔlɔkwí. 24 Mliha anu asón ání asi tson ɔkpa ánfiso. Atsi abanyó ání bulí há ntam anyo ání Bulu léka. Hagar líí há Sinaibusu klé, tsúfé nkpábi mu abí bogyi. 25 Sinaibu ámu bu Arabia ɔmátó. Ilií há nde Yerusalem wúlu. Yerusalem pú mótó ahá féé bogyi nkpábi, Mbla ámu su. 26 Sara mó gyí ɔdihie, ɔlíí há ɔsósó Yerusalem. Mogyí anu yín ní. 27 Tsúfé Bulu asón wanlínhé amu léblí ɔbéε, “Ɔtsi mákwípu, nya ansigyí!

Ɔtsiá ikwí məkódwín mu ki, kplon, afusora okitikiti ansigyísó.

Tsúfé ɔtsi ámúú mu kulu lési mu tswi amu obénya abí tsotsɔtsɔ, dɔn ɔmámúú mu kulu da mu wá ekekegyíeke ámu.”

28 Mí apíó, séi á, mlilabwé Bulu ahá tson mu tóá ɔlehie yáísú; fé alíá ɔlehie yáí asa bɔkwí Isak. 29 Alí bré ámúú á, obí ámúú bɔkwí mu keke, ogyi Ismael amu lédunká Isak amúú bɔkwí mu Ɔɛ Wankíhé túmito ámu. Alí kén igyi há anu nde ní. 30 Táme nkáli Bulu ason wanlínhé amu léblí? Ɔbéε, “Gya ɔkpábi amu muva mu bi, tsúfé megyí ɔkpábi mu bi ámu muva ɔdihie mu bi ámu obégyi amú sí ató.” 31 Mó su apíó, megyí ɔkpábi amu abí anigyí. Ɔdihie ámu abí anigyí.

### *Mliki Mli Iwigyɨsu*

<sup>1</sup> Anɨ iwigyɨ sʊ Kristo lahá anɨlagyi iwɨ! Mú sʊ mlɨlu kínkínkín. Mlɨmátrá tsulá abɔbwe mli nkɔpábi ha mbla ámv.

<sup>2</sup> Mlɨnu! Mí Paulo dé mli bláa ání ní mlesi iwɨ há, betɨn mli keté a, ilosuná ání tó ámúb Kristo lóbwe ámv ɨma mli labi kɔkɔ. <sup>3</sup> Ntráa nde mli olá da mbéé, ɔhagyíɔha ání ɔleha betɨn mv keté á, ilehián ání obégyi Mose mbla ámv féesú. <sup>4</sup> Nde mli bláa mbéé, mli ahá ámúb mlɨdé mbla ámv sʊ gyí, ménɨ Bulu obótsu mli ání mli asón da ɔkpa mv ansító ámv mlɨlamáin iwɨ lé Kristosʊ. Bulu awɨtɔle amv ɨlatswɨ mli pan. <sup>5</sup> Anɨ mó anɨ ansí dɨn ání Bulu obótsu anɨ ání anɨ asón da ɔkpa mv ansító. Inɨ gyí tóá anɨdé ɔkpa kí tsɔn ɔɨe Wankíhé amúb ɔde agyómá yɔ anɨtɔ, tsɔn anɨ hógysɨ ámv sʊ ní. <sup>6</sup> Tsúfé ní anɨa Kristo Yesu anɨgyí kɔle a, ketétɨn ntée ketémátɨn mehián. Múá idehián gyí anɨbʊ hógysá itehá anɨtɔdwé Bulu pó anɨ aba.

<sup>7</sup> Tekɨ mlɨdé mbódí bɔ asa. Ma kóún latin mli ɔkpa ɔbéé, mlɨmátrá buo ɔnɔkwali amv? <sup>8</sup> Megyí Bulu bwehé igyi, tsúfé mɔléle mli. <sup>9</sup> Mlíkan ání bodobodotu-afá kpalobí téhá bodobodo amv fée itotú. <sup>10</sup> Anɨ Wíe lahá nahogyi, ání mlɨmástrá hɔ ɔha bambá atosunáhé dɨn mí nkɔle klé. Bulu ɔbébití ɔhá ámúb ɔde mli agywɨn damlí ámv isʊ.

<sup>11</sup> Mí apíó, ní ntráa nde ɔkan da blí mbéé, ilehián ání ahá butɨn keté á, mómó ntogyi sʊ Yudaɔ bʊtráa bʊdɨn mísú? Mómó ní nde Kristo oyikpalíhesʊ lowu ámv é ɔkan da á, yée ɔhaa méedɨnká mísú o. <sup>12</sup> Mí sʊ mó á, tekɨ ahá ámúb bʊde mli háan beé, ilehián ání mlétɨn keté ámv bawúna flo amú iwɨ.

<sup>13</sup> Mí apíó, Bulu léle mli ɔbéé, mlibégyi iwɨ. Táme mlɨmátɔn mli iwigyí amv sʊ láyótsu mli tsiátó dada

amv. Mboún mlipv ödwe sum mli aba, <sup>14</sup> tsúfé Mose mbla ámv féé líi mbla kule pé ámvú ideblí obéé, “Dwe fú bá fé fú iwí.” ámvsv. <sup>15</sup> Táme ní mlilabwé mli iwí fé mbwikítá-ató, mlidé aba fíni, mlidé aba lalá a, mómó mlíkí wankláán; ní megyí alí mléhi aba.

### *Tsiátó Dada Pú Ōhétó Atsiábi*

<sup>16</sup> Mú sv nde mli bláa mbéé, mliha Ōhe Wankíhé amv okpa mli. Mómó mlímóobwe tóá mli tsiátó dada tekle. <sup>17</sup> Tsúfé tóá aní tsiátó dada tekle ihíé na otsan há tóá Ōhe Wankíhé amv tekle. Tóá Ōhe Wankíhé amv tekle é ihíé na otsan há tóá aní tsiátó dada tekle. Atoku anyó ánfí ilókú só líi abasv, méní mlímóobwe tóá mlitekle. <sup>18</sup> Ní Ōhe Wankíhé amv dé mli kpa á, mómó mlímá Mose mbla ámv asi.

<sup>19</sup> Tsiátó dada bwehé telv ovan. Múgyí; atsi móa ayin asónwa, agywun laláhe bwe, ifintotsiá, <sup>20</sup> ikpitswéé, afátópleí, olu, itré, fú nkule klé dunká, oblókpán, onsipe, aba asumánú, iwumáin lé fú abasv, <sup>21</sup> okabágyáa, ntáv, pléikpada pú móá iléian íni aná. Mú aná iwí asón nde mli bláa, fé aliá nebláa mli yaí. Mbéé, ahá aní butóbwé íni odu buméenya Bulu iwígyí ámvto agyapadié kvkv.

<sup>22</sup> Táme ní Ōhe Wankíhé amv dé aní kpa á, mú abi swiehé aní ibétsiá anito gyí, ödwe, ansigyí, iwilwii, klonya, awitole, yilébwe, onakwalí, <sup>23</sup> ilwii pú iwísvgyí. Mbla kvkvkvkv má invá iletin alí ntobí ánfí okpa. <sup>24</sup> Ahá aní bvgyi Kristo klé bamó amú tsiátó dada pú amú ówólí laláhe Kristo Yesu oyikpalíhe amvsv. <sup>25</sup> Ōhe Wankíhé amv lahá aní nkpa pópwe. Mú sv mliha agyi mv asónsó. <sup>26</sup> Anímátsu iwí súná aba, ntéé wá aba obló, ntéé pé ansí aba atósó.

## 6

*Iku Tsu Lé Aba Asóntó*

<sup>1</sup> Mí apíó, ní mlítɔ ɔku ɔbwé lakpan ku á, mli ahá ámúú Ɖɛ Wankíhé de mli kpa ámú mlinya klɔn tɔi kpla mu pɔtɔɔ. Táme mlíkí mli iwí wankláán, méní mli é mliméedúda ísókí amú odutɔ. <sup>2</sup> Mlitsu iku le mli aba asóntó. Ní mlidé mú bwe alí á, mlidé Kristo mbla ámúsv gyí ní. <sup>3</sup> Ní ɔku dé mu iwí kú ɔbéé mɔfɔn tógyítótó, táme omegyí tɔtɔ a, ɔde mu iwí mlé. <sup>4</sup> Mlikapú mli onutó tsiátó kí. Ní íbu alé á, múmú mlétalí pú íbì sí kántó mli bwehé sv, mlimóɔpu kápú ɔha bambá klé. <sup>5</sup> Tsúfé anitɔ okugyíɔku ɔbósuvá mu onutó atɔ svráhé.

<sup>6</sup> Bulu asún ámú akasípú buyée atɔ wankláán ání búbu iku ha amó asunápú.

<sup>7</sup> Mlimámlé mli iwí. Ɖhaa tamamlé Bulu. Ɖhagyíɔha ɔbókpɔtí tɔá olodu. <sup>8</sup> Ní ɔku lódu tsiátó laláhe wá mu klɔntɔ á, lowu ɔbókpɔtí tsú mótó. Táme ní ɔleha Ɖɛ Wankíhé amú lódu tsiátó wankláán wá mu klɔntɔ á, ɔbókpɔtí nkpa ání itamatá tsú mótó. <sup>9</sup> Mú sv yilébwe mákpɔn aní, tsúfé ní abatɔ mowu aní á, abókpɔtí nkpa ání itamatá mú brétó. <sup>10</sup> Mú sv brégyíbréá anyá mú iwí ɔkpa á, mliha abwe yilé ha ɔhagyíɔha, títriu aní apíó ahógyipú.

*Itsiáha Pú Ɖláda*

<sup>11</sup> Mlíki atɔ wanlínhé akpɔnkpɔntiá napó mí onutó íbì wánlín sísí mli! <sup>12</sup> Ahá ámúú bɔdedunká ání bégyi asu ahá ansító ámú líí mli sv bɛɛ, mliháa abɔtin mli keté ní. Megyí tɔtɔ sù bɔde íní bwe. Alíá Yudafɔ bɔméedunká amúsv bɛɛ, bɔdeblí bɛɛ Kristo oyikpalíhesu lowu ámú pésú ɔha ɔbótsɔn nya nkpa. <sup>13</sup> Keté atínpu amú onutó óó bɔtamagyi Mose mbla

ámɔvɔ. Táme bɔdekléá mlítɔn keté, ménɔ bópɔtsú ɪwɪ súná amó aba ání bahá mlilatɪn keté. <sup>14</sup> Mí mú á, ɪmába mótó ání nótsu ɪwɪ ɔyí ánfɪtɔ tɔtɔɔtɔvɔ, dɔn anɪ Wíe Yesu Kristo oyikpalíhɛvɔ lowu ámv. Tsúfé mv lowu ámv sɔ ɔyító tsiá ɪtráa ma mí labi, mí é mma labi kɔkɔ há mú. <sup>15</sup> Ketétɪn ntéɛ ketémátɪn megyí tɔtɔ. Múá idehián gyí ɔha obémlí ɔha pɔpwe. <sup>16</sup> Iwilwii múa nwewúun ɪtó ahá ámvú bɔde mbla ánfɪsv gyí amv, pú ahá ání bɔhíé bɔgyi Bulu ahá!\*

<sup>17</sup> Asa nékpa mí asún opulu á, mbláa mlɪ. Mlɪtɔ ɔhaa mátrá wa mí tóɪ. Tsúfé mí ɪwɪ apɪná ánfɪ idesuná ání Yesu ɔkpábi ngɪ.

<sup>18</sup> Mí apíó, anɪ Wíe Yesu Kristo ogyíi mlɪ bɔvalɛ. Amen!

---

\* **6:16** Ahá ání bɔhíé bɔgyi Bulu ahá gyí Israel pɔpwe amɔ nɪ.

## **Bulu ntam pɔpwɛ; Nkonya** **New Testament in Nkonya (GH:nko:Nkonya)**

copyright © 2010 Wycliffe Bible Translators, Inc.

Language: Nkonya

Translation by: Wycliffe Bible Translators, Inc.

Nkonya

nko

Ghana

### **Copyright Information**

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Nkonya

**© 2010, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files dated 29 Jan 2022

01b09958-fa53-51d1-aae0-88c7e9302503